

極樂發願文

宗喀巴大師造
法尊法師譯

文殊菩薩化身西藏黃教喇嘛至尊宗喀巴大師寫此「往生西方極樂世界發願文」，為修淨土善信之無上寶典，至誠發願，至誠誦持此文，必得往生極樂世界。

敬禮南無宗喀巴大師

敬禮南無阿彌陀佛大導師

勝行無盡利有情 一念永棄死王畏

恆愍眾生如愛子 禮天人師阿彌陀

能仁數稱讚 最勝極樂刹 發願往生文 隨力而宣說

無明障取捨 瞋劍斬善趣 貪索繫生死 業水漂有海

老病苦浪擊 將入死鯨口 非愛苦擔逼 無依苦哭喚

啟白願證成 救苦無量光 觀音大勢至 並及多眷屬

多劫為度生 莫忘所發心 如鵬飛於空 現通速降臨

今依自他三世所集資糧大海，總集之力，願我臨終，現見阿彌陀，觀音勢至，海眾圍繞。爾時緣於佛及聖眾，發殷重信，無支解苦，具足信境，明記不忘；死已無間，八大菩薩現通而至，示與往生極樂之路。依此得生極樂國土，寶蓮華中，利根大乘。

願生已無間，證得無量陀羅尼，三摩地，無緣菩提心，無盡辯才等功德寶藏，承事供養無上大師阿彌陀等十方諸佛菩薩，受學大乘。

願如實了知諸法真義，剎那剎那以神通力徧往十方無央數佛刹，圓滿一切菩薩大行。

願生淨土已，以此猛利悲心發起無礙神通而還穢土，為諸有情如其根器而說正法，皆悉立於諸佛所讚清淨妙道。

願速圓滿微妙大行，為利無邊諸眾生故，速當成佛。

願捨壽行時，現見阿彌陀，海眾遍圍繞，信悲滿我身，中有初現起，八佛子示路，化生極樂已，度濁土眾生。

乃至未得如是勝位，願一切生中得清淨身，聞思修習於佛聖教，教證二法。

願彼身不離善趣七種功德而為莊嚴。

願如是一切生中得宿念。

願一切生中恆觀三有悉無堅實，欣慕解脫所有功德，於佛世尊善說法律而為出家。

願出家之時，雖微小罪，悉皆無犯，究竟戒藏，證大菩提，如不動比丘。

願一切生中如實了知染淨已，究竟支中，明記受持諸法文義，獲得圓滿大陀羅尼。

願如自所受為他宣說，獲得清淨無礙辯才。

願一切生中得健行等三摩地門，肉等諸眼，神境等通。

願一切生中得廣大慧，自力能辨諸所捨處。

願獲明了慧，能無紊亂，如實簡擇，雜染清淨，最微細處。

願證速急慧，不解邪解，猶預意樂，生已無間，無餘永滅。

願得甚深慧，於他不能持佛所說文義，無滯能入。

願總遠離一切過失，以慧簡擇佛經文義，由巧便慧究竟一切諸菩薩行，如曼殊尊。

願獲得如是廣博明了速疾深慧，為欲攝受賢善，降伏邪說，喜悅智所有支分，謂緣一切佛教獲得講說辯論著作善巧究竟。

願一切生中破除樂著自利作意，及初一切菩薩大行退懼意樂，愛樂利他到達智力第一彼岸；由於巧便大菩提心，究竟一切諸菩薩行，如觀自在。

願一切生中行二利時，摧伏一切魔外他論，由巧便力究竟一切諸菩薩行，如秘密主。

願一切生中永離懈怠，精進圓滿大菩提行，從初發心剎那不廢，由大精進證大菩提，猶如無等釋迦法王。

願一切生中能摧一切身心疾病，菩提障難，略稱其名，便能滅身語意一切痛苦，如藥師佛。

願一切生中欲壽究竟，略稱其名，能壞一切非時橫死，如阿彌陀佛。
願有命難時，得見阿彌陀佛，四種事中隨順調伏，示現化身，見已無間，一切命

難悉皆消滅。

願於如應調伏所現身了知，即是阿彌陀佛，生堅固信，由此力故，一切生中，不離阿彌陀，為善知識。

願一切生中，常為世出世間，一切功德根本，具足德相，大乘善友，歡喜攝受。

願被攝受時，於善知識獲不壞信，由一切門承事歡喜。

願凡其所不喜，剎那不作。

願善友開示一切圓滿教授教誡。

願如實了悟一切義已究竟正行。

願剎那不隨惡師惡友增上而轉。

願一切生中證悟一切，深信業果，永出離心，大菩提心，清淨正見，無有功用任運恆轉。

願一切生中身語意業一切善根，唯成利他及清淨大菩提因。

乃至我未得 能仁最勝位 願得修道身 出家念宿命

總持辯才定 通等功德藏 無比智悲力 速滿菩提行

非時死相現 即見彌陀身 摧壞死王力 證無死持明
彌陀一切生 作大乘知識 於佛所讚道 剎那不退轉
若時棄有情 生起自利心 不愚利他事 巧便行利他
願誦憶我名 諸受惡業果 得圓滿安樂 上昇大乘梯
略明佛子傳 修菩薩行障 消滅諸順緣 如意皆成辦

釋迦法王無量光 彌勒妙音秘密主

觀音海眾緣起力 如是諸願速圓滿吉祥圓滿 (往生極樂世界發願文終)